

## Criterios específicos para a adxudicación de prazas nas Universidades públicas do SUG

5.- Segundo o establecido no artigo 22 do RD 412/2014, de 7 de xuño, as Universidades establecerán a orde de prelación na adxudicación das prazas, respectando as porcentaxes de reserva de prazas recollidos nos artigos 24 ao 28 do Capítulo V do dito Real Decreto.

5.1.- As prazas da **Cota Xeral** adxudicaranse aos estudantes que reúnan algún dos requisitos establecidos no Procedemento de admisión (punto 4), atendendo a súa Nota de Admisión.

5.2.- . Só poderá optar aos **dobres graos** o estudantado que reúna os requisitos legais de acceso e admisión para ambos graos.

5.3.- **Cotas de reserva:** Reservarase unha porcentaxe do total de prazas que para cada título e centro oferten as universidades para as cotas de reserva que se sinalan a continuación:

- a) **Maiores de 25 anos:** Segundo o establecido no artigo 24 do RD 412/2014, de 7 de xuño, para os estudantes que superasen a proba de acceso á universidade para Maiores de 25 anos de idade, reservarase un 2 por 100 do total de prazas que para cada título e centro oferten as Universidades. A súa nota de Acceso á Universidade (NAU) será a Nota da súa Proba de Acceso á Universidade para Maiores de 25 anos (NPAU-M25). Dentro do seu cupo terán preferencia na admisión nas universidades so Sistema Universitario Galego os estudantes que teña realizado a proba de acceso na CiUG e na rama de coñecemento vinculada á opción escollida na fase específica.

$$\text{NAU} (\geq 5) = \text{NPAU-M25}$$

- b) **Maiores de 45 anos:** Segundo o establecido no artigo 25 do RD 412/2014, de 7 de xuño, para os estudantes que superasen a proba de acceso á universidade *organizada pola Comisión Interuniversitaria de Galicia (CiUG)* para Maiores de 45 anos de idade, reservarase un 2 por 100 do total de prazas que para cada título e centro oferten. A súa nota de Acceso á Universidade (NAU) será a Nota da súa Proba de Acceso á Universidade para Maiores de 45 anos (NPAU-M45).

$$\text{NAU} (\geq 5) = \text{NPAU-M45}$$

- c) **Titulados universitarios:** Segundo o establecido no artigo 28 do RD 412/2014, de 7 de xuño, para os estudantes que xa estean en posesión dunha titulación universitaria oficial ou equivalente, reservarase un 1 por 100 do total de prazas que para cada título e centro oferten. A súa Nota de Acceso á Universidade (NAU) será a nota media do título universitario oficial correspondente (NMTU) ou, no caso de que presente un título de máster, a nota media ponderada, en función do número de créditos,

resultante da nota media do máster e do título universitario oficial que o faculte para o acceso as ensinanzas de Máster.

$$\text{NAU} (\geq 5) = \text{NMTU} \text{ ou}$$

$$\text{NAU} (\geq 5) = (\text{NMTG} * \text{N}^{\circ}\text{CG} + \text{NMTM} * \text{N}^{\circ}\text{CM}) / (\text{N}^{\circ}\text{CG} + \text{N}^{\circ}\text{CM})$$

NMTG e N<sup>o</sup>CG indican, respectivamente, a Nota media e o número de créditos dos estudos de Grao ou do título universitario oficial que o faculte para o acceso as ensinanzas de Máster, e

NMTM e N<sup>o</sup>CM indican, respectivamente, a Nota media e o número de créditos dos estudos de Máster.

A estes efectos, no caso de títulos distintos dos de grao consideraranse as diplomaturas e Enxeñerías Técnicas como Titulacións de 180 créditos e as licenciaturas como Titulacións de 300 créditos.

- d) **Estudantes con discapacidade ou con necesidades educativas especiais permanentes asociadas a circunstancias persoais de discapacidade:** Para os estudantes que teñan recoñecido un grao de discapacidade igual ou superior ao 33 por 100, así como para aqueles estudantes con necesidades educativas especiais permanentes asociadas a circunstancias persoais de discapacidade, que durante a súa escolaridade anterior precisasen de recursos e apoios para a súa plena normalización educativa, reservarase o 5 por 100 das prazas totais de cada ensinanza universitaria.

A tal efecto, os estudantes con discapacidade ou con necesidades educativas especiais permanentes asociadas a circunstancias persoais de discapacidade deberán presentar o correspondente certificado de cualificación e recoñecemento do grao de discapacidade expedido polo órgano competente da Comunidade Autónoma de procedencia do interesado ou interesada.

As cotas de reserva de prazas para os estudantes con discapacidade manteranse nas diferentes convocatorias de preinscrición que se realicen ao longo do ano.

- e) **Deportistas de Alto Nivel ou de Alto Rendemento:** Para os deportistas de alto nivel ou de alto rendemento que acrediten esta condición, reservarase o 3 por 100 das prazas totais de cada ensinanza universitaria, agás nos casos das ensinanzas universitarias oficiais de grao en Ciencias da Actividade Física e do Deporte e grao en Fisioterapia en que se reservará un 8 por 100 do total. As prazas reservadas para este colectivo adxudicaranse tendo en consideración os seguintes criterios:
- 1<sup>o</sup>) Nota de Admisión
  - 2<sup>o</sup>) Deportistas de Alto Nivel (Artigo 2.2. do RD 971/2007, de 13 de xullo, sobre deportistas de alto nivel y alto rendimiento).
  - 3<sup>o</sup>) Deportistas de Alto Rendemento (Artigo 2.3. do RD 971/2007, de 13 de xullo, sobre deportistas de alto nivel y alto rendimiento).

As cotas de reserva de prazas para os deportistas de alto nivel ou alto rendemento manteranse nas diferentes convocatorias de preinscrición que se realicen ao longo do ano.

Os deportistas de alto nivel ou alto rendemento estarán exentos da realización das probas específicas de acceso ao grao en Ciencias da Actividade Física e

do Deporte.

5.3.- As prazas obxecto de reserva que queden sen cubrir acumularanse ás ofertadas polas universidades pola cota xeral, en cada unha das convocatorias de preinscrición, agás o disposto para os deportistas de alto nivel no artigo 27 do Real decreto 412/2014, do 6 de xuño e para estudantes con discapacidade.

#### *6.- Orde de prelación na adxudicación das prazas.*

Para a admisión ás ensinanzas universitarias oficiais de grao en que se produza un procedemento de concorrencia competitiva, é dicir, en que o número de solicitudes sexa superior ao número de prazas ofertadas, as universidades adxudicarán as prazas atendendo aos seguintes criterios:

1º) En primeiro lugar, adxudicaranse prazas aos estudantes que reúnan os requisitos académicos para o acceso á universidade na convocatoria ordinaria do ano en curso ou en convocatorias ordinarias ou extraordinarias de anos anteriores.

2º) En segundo lugar, adxudicaranse prazas aos estudantes que reúnan os requisitos académicos para o acceso á universidade na convocatoria extraordinaria do ano en curso.

En todo caso, deberase ter en conta que o alumnado que presente na convocatoria extraordinaria a súa solicitude de admisión para o ingreso, terá a mesma consideración que o alumnado que aprobe a Proba de ABAU na convocatoria extraordinaria na adxudicación de prazas, aínda que superase a proba de acceso á universidade ou os estudos que o habiliten para acceder á universidade na convocatoria ordinaria do ano en curso ou en anos anteriores.

#### *7.- Asignación de prazas.*

7.1.- A CiUG asignará as prazas ofertadas en cada ensinanza universitaria en cada un dos prazos de matrícula que se establezan. A cada estudante asignaráselle a ensinanza universitaria de maior preferencia que lle corresponda en función da cota pola cal se solicita o acceso e tendo en conta, en todo caso, a orde de prelación, os criterios de valoración e a preferencia para a adxudicación de prazas establecidos.

7.2.- En cada prazo de matrícula publicarase a relación de estudantes admitidos para matricularse en cada ensinanza universitaria, indicando os lugares e as datas para formalizar a matrícula. Os estudantes admitidos para matricularse na ensinanza universitaria solicitada en primeiro lugar de preferencia, deberán matricularse no prazo establecido para o efecto; de non facelo perderán os seus dereitos de matrícula nesa convocatoria. Enténdese por primeira preferencia aquela que o alumnado solicite en primeiro lugar, ou en lugares sucesivos se as ensinanzas universitarias solicitadas por enriba dela esgotaron as súas prazas.

A Consellería de Educación e Ordenación Universitaria remitirá telematicamente a cada universidade os datos persoais e académicos dos estudantes admitidos a matricularse nela en cada prazo. Finalizado o prazo de matrícula, cada universidade remitirá telematicamente á Consellería de Educación e Ordenación Universitaria a relación de estudantes matriculados.

7.3.- Na convocatoria extraordinaria non se ofertarán prazas nas ensinanzas universitarias que teñan a matrícula cuberta na convocatoria ordinaria, ou aquelas nas que, tendo en conta a matrícula existente e a correspondente lista de agarda de

solicitantes, a CiUG considere que existen datos obxectivos que permitan prever esa circunstancia. En todo caso, non se poderán deixar prazas vacantes previamente ofertadas mentres existan solicitudes formalizadas dentro dos prazos establecidos.

7.4.- As universidades poderán establecer condicións ou probas especiais para o acceso a determinadas ensinanzas. Estas condicións ou probas especiais deberán ser incluídas polas universidades na memoria do plan de estudos verificado e autorizado.

7.5. O alumnado poderá presentar reclamación á súa asignación de prazas no LERD en que presentou solicitude de acceso. A dita reclamación irá dirixida ao presidente da CiUG e a resolución da reclamación será asinada polo delegado na CiUG do reitor da universidade en que se imparta a ensinanza universitaria obxecto da reclamación. O resultado comunicaráse ao interesado ou interesada a través das listaxes de asignación de prazas ou dunha notificación persoal e indicarse, se é o caso, o prazo para matricularse.

Contra a resolución poderá interpoñerse recurso potestativo de reposición no prazo dun mes perante a propia CiUG, que porá fin á vía administrativa. Neste caso non se poderá interpoñer o recurso contencioso-administrativo mentres non recaia resolución expresa ou presunta do recurso potestativo de reposición.

No caso de presentar recurso contencioso-administrativo, a Administración demandada será a universidade responsable da ensinanza universitaria en que o estudante solicita o ingreso.

O presente acordo entrará en vigor na data da súa publicación no Taboleiro Electrónico Oficial.